

施南府志卷之三十

知施南府事王協夢監修

雜志

雜記

方志之末多有雜記以舊聞軼事諸類未能盡收或野史稗官事蹟足資考証故別而存之亦補闕拾遺意也舊志摭摭史志涉於泛濫今增損其半較爲簡要云志雜記而以辨訛附於末爾雅釋獸魑如小熊竊毛而黃註今建平山中有此獸施南府志

卷之三十

雜志

狀如熊而小毛麕淺赤黃色俗呼爲赤熊疏竊淺也狀如小熊淺毛而黃者名魑

巫山縣在峽中亦壯縣也市井勝歸峽二郡隔江南陵山極高大有路如綫盤屈至絕頂謂之一百八盤蓋施州正路黃魯直詩云一百八盤攜手上至今歸夢繞羊腸卽謂此也

陸游入蜀記

黃山谷云予旣作竹枝詞夜宿於歌羅驛夢李白相見於山間日子往謫夜郎於此聞杜鵑作竹枝詞三疊世傳之否予細憶集中無有詩三誦乃得之一聲望帝花

片飛萬里明妃雪打圍馬上胡兒那解聽琵琶應道不
如歸竹竿披面蛇倒退摩圍山間獼猴愁杜鵑無血可
續淚何日金鷄赦九州命輕人鮓甕頭船日瘦鬼門關
外天北人墮淚南人笑青壁無梯聞杜鵑

恩施縣南三十里許有地極幽僻名白泥坡明末紳士
童大護莊也莊丁童有福一日山行見二白犬搖尾而
前狀甚猙獰異而逐之入一洞洞內有水清且淺犬涉
水而過有福亦隨之往不數武出洞口豁然開朗烟村
繡錯桑柘依稀宛然桃源景物心益異之欲窮其迹約

施南府志

卷之三十

雜志

二

里許有數老入聚飲樹下見有福詰所自以逐犬對老
人曰是吾犬也賜之食有福食訖納所餘於衣袖及出
視之肉則木石蔬則草也歸而告其主同往訪之頑石
荒草茫然無迹矣

秋燈叢話

開元寺鐘唐開元中清江郡叟牧於郡南田間忽聞有
異聲自地中發叟與牧童俱驚走自是叟病熱甚少愈
夢一丈夫青衣襦顧謂叟曰遷我於開元觀叟驚寤及
曉偕其子往郡南鑿其地約丈餘得一鐘色青乃所夢
丈夫衣色也遂白郡守移至開元觀日辰時不擊自鳴

聲極震響清江人莫不驚歎

恩施縣紅崖山高數百仞峻嶺崇崖爲全真棲遊之所
順治初有蔣道士者入山訪修煉地忽見茂林修竹中
瓦屋數楹白板朱扉最爲幽潔履其室空洞無物惟粉
壁題七言一絕筆勢飛舞墨跡猶濕詩曰頑石盤旋白
玉松枝頭暗結紫芙蓉青雲有路終須到紅日光輝滿
太空蔣諷吟數遍默識其處次晨負笈至竹樹依然而
舍宇杳如踏尋竟日終不可得又山中有巨杉恒隱藏
沙土內傳爲千百年物居人求之者持錐刺土嗅錐末

施南府志

卷之三十

雜志

三

有香氣則掘得之或負之不盡表異其跡異日往視並
表亦失之矣

宋志

杜詩云籠竹和烟滴露梢施地慈竹笋出與林齊籜全
不解一線彎彎如垂柳如此兩三月方解籜次年始見
枝葉山深多霧午時露珠猶滴未嘗不嘆詩人體物之

工也

宋志

湖廣通志載施州漫水寨有木名普舍樹普舍華言風
流也昔覃氏祖於東門關伐一異木隨流至那車復生
根而活四時開百種花覃氏子孫歌舞其下花乃自落

取而簪之他姓往歌花不復落尤爲異也

格致鏡原

施南枚馬洞有泉每日流出五色圓石數枚居民拾之
次晨亦然又野貓洞經水漲退時流出八方水晶石石
現山水人物諸狀通泉中亦有類此者

童志

杜詩云土俗坐男使女立男當門戶女出入施地鄉僻
處皆然男主家中接賓客飲酒食肉而已水耕火種婦
女任之舊聞坎爲北方卦故男健於女離爲南方卦故
女健於男健者常勞弱者常逸驗之冀北交趾皆然今
見一斑也

宋志

施南府志

卷之三十

雜志

四

獸莫猛於虎施南則有一豬二熊三虎之謠豬有羣有
獨羣者年未深無大異獨者經年既久無可羣而羣亦
莫敢近也合抱木嚙如拉朽大石喙觸之立碎虎豹見
之咸避莫敢鬪者

宋志

趙姑者施南崇寧里民女也及笄未字餉父於田渴而
飲於溪久不返父覓不得惟見飲處插金釵一股拔之
不起夜見夢於父曰兒爲龍攝去不能生還明春豫於
溪內插籬置筍春雨雷鳴得魚必夥卽以爲甘旨之供
父如言歲頗獲利以此畢餘生焉村人以香楮往祝者

亦必得魚至今相沿爲趙姑魚而所插金釵化爲鐵柱
云 童志

恩施縣龍洞山在城東七里山半有洞高廣丈餘洞口
水盈盈清淺內則淵深不測相傳爲龍窟也洞有潮子
午時至其未至之先有聲如雷俄霧氣迷濛自洞中出
而洞口水騰湧若鼎沸如是者三潮卽噴激上射高可
數尺迅折而下匹練飛空勢若倒海砰礚之聲震溢山
谷食頃始退落如初歲旱守令祈雨必焚疏通誠往祭
候潮至以瓶取水馳歸雨立降不誠則潮不至

施南府志

卷之三十

雜志

五

殷太公者衛旗軍性長厚而婦極貪鄙公外出有買穀
數石者婦量與之矣公歸佯曰家有秕穀何不石攬二
三升乎婦曰已攬若干矣公默計其數補買者曰代昨
日茶蓋覆妻之短也其夜夢神授以二紗帽曰以旌善
人後妻生子之盤妾生子之銘俱以歲貢先後任主簿
書香不絕 以上童志

明時蔡姓者衛富紳也吝而刻家有餘米先一宿用水
漬之以鬻於人一日雷雨大作掣蔡跪庭中書其背作
天字用水四字而皆闕其中豎雷殷殷字旁木上其火

如線牽宅中而不然越二日有狂生候蔡見其字曰符非符字非字何以服人雷復震視蔡背則中添長直始識其字踰年死子孫亦不振其田園宅舍皆化爲烏有矣

童志

施黔州多白花蛇螫人必死縣中板簿多退丁者非蛇傷則虎傷之也州連蠻獠三月草長蛇盛則防戍至九月草衰蛇向蟄則又防秋矣居民造毒藥取蛇倒懸之以刀刺其鼻下以器盛其血第一滴用以毒人立死故只取第二第三四者毒血一滴以麩和作四丸中此毒施南府志

卷之三十一

雜志

六

者先吐血須臾五臟壅滿潰爛李純之少監云惟朱砂膏可治此毒純之以藥救人無數仍刻其方以示土民

談苑

人山嶺在老熊坡下坡上望之峰與坡齊遠至一二十里則坡隱不見一峰特聳如人形叛民向龍祖塚向焉相近戎角村捲洞寨內有石類婦人出廖氏女亦材武向龍娶焉成化間向廖二姓相比以叛剽掠巫建等縣屢勤王師戎角前據板龍尾斑鳩崖下有清江後有容美萬山之阻中多良田廣園故官軍至卽保老鷹捲洞

等寨人山後小溪前清江二水周圍險固難奪正德五年指揮童昶奉檄破之擒首惡數十人追出被擄戶口餘黨撫順昶精地理知入山作崇穴石生妖乃移向氏老熊坡祖塚鑿人山腦復至捲洞寨鑿其石人山鑿雷復震之尤見天人感應焉

向述河內郡人爲漢景帝駙馬時巴蠻攻劫帝以王鎮秭歸元妃公主劉氏次妃許氏王之健將則許氏兄弟也王在鎮安攘有功教養有法得楚蜀人心生子十六分十子入衡陽六子入川聚橋頭分遺破釜命各執一

施南府志

卷之三十

雜志

七

片世守爲信王卒葬秭歸篁竹沱東晉桓誕自立爲施王後以沔北降魏施爲向氏所據王顯靈於大宋爲歸民驅疫民上狀遂敕封建廟賜額蠻人畏疫故自歸而上達於施州多有不祀其先而祀所謂向王者

許環沒之明年有衛紳張姓者夜夢勾見本衛城隍則巍然上坐者許也怒數張曰爾以明經出仕讀聖賢書枉致人死可乎命鬼卒以刀插兩耳張以同窗故再三懇令去其右喝之出則見左廊梁上有鐵鈎鈎背而懸之者亦衛紳張姓亦明經出仕皆許之窗友也夢醒駭

然逾月而左耳後病疽潰至頸久而垂危所夢鈎背者猶無恙也一日來視歸而疾作疽發背二張相繼而亡蝦蟆石在東門渡口水中見則有災眚

方洞峽口有一方洞無路可達只可北岸對望其中有板或露或隱或整齊或參差每見則附近居民多不吉祥

蝦蟆池在衛城南一百二十里池中多蝦蟆方春水生輒跳擲岸上後渠生爪前趾變翼隨衆禽飛去變未成者土人常得於雀網中

以上童志

施南府志

卷之三十

雜志

八

土產香楠而民不知蓄陳者絕少產茶而民拙於焙香者絕少產五加皮以浸酒香美有殊效而民尚桂花酒三者皆恨事附志之

宋志

俗以麴蘖和雜糧於罋中久之成酒飲時開罋沃以沸湯置竹管於其中曰啞篔先以一人吸啞篔曰開罋然後彼此輪吸初吸時味甚濃厚頻添沸湯則味亦漸淡蓋蜀中釀法也鉛山蔣心餘太史忠雅堂集有啞酒詩可謂曲盡其妙附載於此地鑪暖深鑿酒香生座隅緩火蒸融融鬢發看浮蛆截竹爲畱犁露頸沒其趺主客

次第嘗吸之嘽徐徐中通風過簫暗引樂出虛注泉便
作醴仙釀逡巡如讐面白水添讐底醇醪儲貫糟出沈
齊氣體成須臾枳橘性則一涇渭源豈殊神丹變兼金
黃芽轉河車物理可旁悟速化然非歟再拜求釀法酒
經願箋疏杭稻穀梁稷皆可麴蘖俱和以衆露香欲點
塞上酥百花歸蜂衙五金同一鑪至味啞乃出淺嘗得
其粗蜀有雲安春復有郫筒酷可惜少陵翁取醉徒咨
且東坡不解飲真一堪胡盧胡啖道士蜜寧發調水符
浙人尙越釀六載糟邸居今夕換別腸沈湎不願餘只
施南府志

卷之三十一

雜志

九

疑虹首垂又疑斗柄斲底須吸西江欲續無功書久出
醉翁門才識涪溪醺彭宣醺侯芭是皆聖人徒

祥管

宋

太宗太平興國元年五月施州麥秀兩岐

端拱元年秋七月施州衛鼓角池邊生嘉蓮

二年七月施州好蚘蟲生害稼

眞宗大中祥符七年九月施州禾一莖九穗至十二穗

仁宗嘉祐六年八月施州歌羅砦生芝四本

英宗治平元年施州大水

哲宗元祐二年正月白虹貫日

元符元年八月施州李木連理

高宗紹興二十三年八月施州大風雨

三十一年八月建始大水漂民舍死者甚衆

孝宗淳熙三年冬施州大饑 以上並見宋史五行志

明

永樂初施州地大震苗蠻七十餘處隨相攻害

宏治三年春二月施州石信村山崩有大石二類人形

施南府志 卷之三十一 雜志

十

卓立路傍距五里清江南岸山裂大石塞江水遂壅
為灘

十八年施州大水

正德十一年夏施州大水壞城漂民居馬欄寺山裂
見湖廣通志

十二年七月龍馬村柿樹僵仆三年忽有聲如雷自起

卓立復生枝葉 王志

國朝

康熙二十二年施州蟲

二十四年雨雹

乾隆十九年秋大熟

四十四年清江水溢

以上見舊志

嘉慶三年恩施成豐利川建始俱有年

五年恩施麥有秋秋恩施建始有年

六年宜恩麥有秋秋恩施有年

十三年四月十六日恩施縣西鄉燕子巖山崩四里許

壓民韓姓張姓宅斃男女共二十一口縣令張家櫬

哀以詩

施南府志

卷之三十一

雜志

十一

辨訛

舊志魏咸熙二年施州靈龜產於龜溪考魏志元帝咸

熙二年春二月甲辰胸臆縣獲靈龜以獻按胸臆屬蜀

郡故城在今夔州府雲陽縣西非施州界且三國時無

施州名舊志殊失考

舊志載此地唐為業州珍州鶴州費州按唐書地理志

施州清化郡本清江郡天寶元年改為縣一清江一建

始隋義寧元年置開夷武德元年省入清江義寧二年

置業州貞觀八年廢屬建始此則業州之隸清化郡也

至蔣州龍溪郡本舞州長安四年以沅州之夜郎涪溪
二縣置開元十三年以武舞聲相近更名鶴州大歷五
年更名蔣州領縣三峩山梓薑涪溪此鶴州之隸龍溪
郡不隸清江郡也費州涪州郡貞觀四年析思州之涪
州扶陽置縣四涪州扶陽多田城樂此費州之隸涪州
郡不隸清江郡也貞觀十六年開山崗置珍州併置夜
郎酈臯樂源三縣後爲夜郎郡元和二年廢縣皆來屬
此珍州之隸溱州溱溪縣不隸清江郡也

杜甫寄裴施州詩黃鶴以爲裴冕朱鶴齡力辨其非以
施南府志卷之三十 雜志 十三
是詩爲大歷二年冬月所作引公移居東屯詩及史所
載大歷二年二月左僕射裴冕置宴於子儀之第爲証
援據甚辨但裴冕貶施州刺史唐書本傳紀載甚明豈
可因詩未註名遂謂非其人乎又唐書陳元振傳亦云
冕貶施州則黃鶴斷以爲冕未可云誤

舊志載巴蔓子尹珍於人物考明一統志未載二人巴
蔓子爲巴子國臣在重慶府以施郡都亭山有巴蔓子
墓故收入人物至尹珍爲母斂人在今遵義府乃漢武
平夜郎所置牂牁郡屬縣也與施無涉

謹按明一統志施州在春秋爲巴國界何必巴蔓子之不爲施人况都亭旣載其墓而不載其人於人物義亦未安

舊志載趙君復於選舉趙國珍田康於人物考唐書南蠻列傳開元中牂牁酋長謝元齊之孫嘉藝襲官封其後趙氏爲酋長二十五年趙君道來朝其裔趙國珍有方略授黔中都督屢敗南詔護五溪十餘年終工部尚書又趙氏世爲酋長夷子渠帥姓季氏與西趙皆南蠻別種勝兵各萬人自古未嘗通中國黔州豪帥田康諷施南府志

卷之三十

雜志

三

之故貞觀中皆遣使入朝按三人皆南蠻世襲酋長非施州人舊志誤載致通志亦相沿而誤宜刪去舊志載杜甫於流寓考唐書本傳及杜集年譜實未至此

舊志載鄭虔於流寓以杜甫有鄭典設自施州歸詩遂以鄭典設爲虔也按唐書百官志典設爲東宮官考鄭虔本傳虔未嘗爲此官杜所贈詩者自別一人未可以虔實之也

按舊志載杜甫鄭虔於流寓相承已久或別有所據

今李志以唐書列傳未載遂並去之然明鄒公維璉
謫戍施州本傳亦未載而鄒公在施遺蹟甚多未可
謂其未至施也史之缺略者多矣其軼時見於他說
與其過而去之不如過而存之少陵贈鄭典設自施
州歸詩未云我有平肩輿前途猶準的翩翩入鳥道
庶免蹉跌厄舊志載入流寓蓋因此也今仍舊載入
舊志載施王屯云桓元子誕竄蠻中自稱施王考晉書
桓元誅後桓氏遂滅亦不載誕爲元子此當刪去

按魏書太陽蠻酋桓誕遣使內屬高祖嘉之拜征南
施南府志

卷之三十 雜志

古

將軍東荊州刺史襄陽王聽自選郡縣誕自天生桓
元之子也初元奔至枚回洲被殺誕時年數歲流竄
太陽蠻中遂習其俗及長多智謀爲羣蠻所歸誕旣
內屬治於郎陵卒諡剛子暉襲爵弟叔興拜南荊州
刺史正光中南叛二荆西郢蠻大擾據此則誕乃元
子荊州蠻亦其所統施王屯之名殆始於此歟

舊志載董鉞於職官考宋史熊本經制涪井事蠻酋田
現等內附夔路轉運使判官董鉞副使孫珪知施州寇
平皆以招納功被賞是董鉞爲夔路轉運判官非施州

職官也如何載入職官乎

按宋史云判官董鉞副史孫珪知施州是言二人知施州也寇平皆以招納功被賞是言蠻寇平二人皆被賞也考各史言某官知某州及某事某寇平者非一寇平不必爲人姓名也今李志不載董孫二人於職官而以寇平爲人姓名載入職官考宋史及統志俱不載寇平知其非人姓名也且李志以夔路轉運丁謂知夔州林栗列名宦內而不載董孫二人於職官又何謂也丁謂爲宋巨姦林栗倡禁道學豈可廁

施南府志

卷之三十

雜志

五

之宮牆使濫膺俎豆乎今於名宦志內去丁謂林栗於職官志內去寇平仍列董鉞孫珪焉

舊志以沙渠作施州按沈約宋書州郡志吳孫休永安三年分宜都縣置建平郡領信陵興山秭歸沙渠四縣晉亦有建平郡太平元年吳平併合永初

宋武帝年號

郡

國有南陵建始信陵興山永新永寧平樂七縣按太康地理志無南陵永新永安平鄉新鄉五縣疑是東晉所立信陵興山沙渠吳所立建始晉初所立也領七縣巫

秭歸歸鄉

太康地理志秭歸有歸鄉故夔子國

北井泰昌沙渠新鄉此宋

書所載也今按巫卽今巫山縣秭歸卽今歸州歸鄉亦在歸州北井卽今夔州大寧縣後周省入太昌按晉太昌後周改大昌大昌亦卽今夔州大寧縣惟沙渠新鄉不詳所在考水經注渠出南巴嶺流逕宕渠縣謂之宕渠水漢有宕渠縣明一統志渠縣本漢宕渠縣地俱在今四川順慶府之南充蓬州營山廣安渠縣大竹兵池等地界有渠縣而無沙渠之名以愚考四川順慶府東與夔州府梁山縣連界建平與夔州府連界建平沙渠旣無明文可考大抵不離順慶府所屬州縣等界者近施南府志

卷之三十一

雜志

二

是且宋書云沙渠晉起居注太康元年立按沙渠是吳建平郡所領吳平不應方立不詳是宋書不特未據太康地理志註明沙渠所屬並所立亦且不詳舊志謂卽施州何所考據而云然謹按舊志以沙渠作施州地原非無據李氏宗汾雜引史志力辯其非且援水經注渠出南巴嶺流逕宕渠縣謂之宕渠水遂欲以四川順慶府之渠縣爲沙渠地謂沙渠屬建平郡建平與夔州府連界順慶與夔之梁山連界沙渠旣無明文可証大抵不離順慶

考之吳孫休元帝三年十一月置建平郡信陵與
山秭歸沙渠四縣沙渠既隸建平分宜都地置則沙
渠必近宜都可知且與秭歸諸縣同隸建平則沙渠
必與秭歸諸縣相連可知今施東接宜都東北接歸
州興山其為沙渠固已確然可信何至越夔至順割
一渠縣來屬之理且尤有可據者則在夷水即今水清江
經注夷水又東逕建平沙渠縣縣有巫城南岸山道
五百里其水歷縣東出焉又夷水自沙渠入佷山縣

施州府志

卷之三十九

雜志

十七

佷山漢縣屬武陵故城在今長陽縣西

又東逕佷山縣故城南又東北

逕夷道縣北又東逕宜都縣北東入江沙渠為夷水
所經下流入佷山宜都則即夷水以定縣沙渠之為
施不大彰明較著乎安得謂無明文可証而牽一不
相聯屬之渠水且以一字偶同之渠縣當之真不足
資一噓矣

舊志載成汭於名宦因唐書本傳有請立廟以祠之文
更不詳考本末今者本傳則知汭本盜賊因時多故籍
據歸龜其文鄂州則黨朱全忠而抗王師至於兵其身

死遂失施州本無功德於施不得入名宦詳兵事志
舊志載伍思志於名宦考宋史係伍思智又增其文云
以拒元兵竟復夔州今節錄宋史入兵事志

按恩施縣志載東坡鐵溝行贈喬太博一詩查初白補
註云鐵溝水原出烽火山流經諸城縣東北一十五里
入灘水見陳圻山東志今闌入施州非也然明一統志
亦載鐵溝水在衛城東則承訛已久矣

南史解叔謙母有疾夜於庭中稽顙祈福聞空中語云
此病得丁公藤爲酒復瘥卽訪醫及本草注皆無識者

施南府志

卷之三十

雜志

六

乃求訪至宜都郡遙見山中一老公伐木問其所用荅
曰此丁公藤療風尤驗叔謙便拜伏流涕具言來意此
公愴然以四段與之并示以漬酒法叔謙受之顧視此
人不復知處依法爲酒母病卽瘥按東醫寶鑑湯液篇
云性溫味辛無毒主風補血衰者是其驗也一名南藤
莖如馬鞭有節紫褐色葉如杏葉而尖今利川縣小溪
河猴子崖有之

施南府志卷之三十終